

VI. ANUNCIOS**A) ADMINISTRACIÓN AUTONÓMICA****CONSELLERÍA DE ECONOMÍA E INDUSTRIA**

RESOLUCIÓN do 22 de xullo de 2026, da Dirección Xeral de Planificación Enerxética e Minas, pola que se outorgan as autorizacións administrativas previa e de construción para a infraestrutura de distribución de enerxía eléctrica denominada LAT 132 kV Chantada-Oural Regulamentación apoio número 47, no concello do Saviñao (Lugo), e que promove UFD Distribución Electricidad, S.A. (expediente IN407A 2025/199-2).

Feitos:

1. O 12.11.2025 UFD Distribución Electricidad, S.A. (en adiante, UFD) presentou, ante o Departamento Territorial de Lugo da Consellería de Economía e Industria (en adiante, departamento territorial), a solicitude de autorización administrativa previa e autorización administrativa de construción para a infraestrutura de distribución de enerxía eléctrica denominada LAT 132 kV Chantada-Oural Regulamentación apoio núm. 47, no concello do Saviñao (Lugo), á cal se lle asignou o número de expediente IN407A 2025/199-2.

Esta solicitude acompañouse, ou completouse posteriormente, coa seguinte documentación técnica:

- Proxecto de execución denominado LAT 132 kV Chantada-Oural Regulamentación apoio núm. 47, asinado pola enxeñeira industrial María Isabel López Ferrer (colexiado núm. 17.566 do Colexio Oficial de Enxeñeiros Industriais de Madrid –COIIM–) e visado por este colexio, con núm. 202503601 e data 12.9.2025; e no que figura un orzamento total de 29.262,09 euros e un prazo de execución de 14 meses.

- Separatas técnicas do proxecto de execución para as entidades afectadas: Concello do Saviñao e Dirección Xeral de Patrimonio Natural.

- Declaración responsable asinada polo técnico proxectista con data do 10.9.2025, exida no artigo 53.1.b) da Lei 24/2013, do 26 de decembro, do sector eléctrico.

Segundo consta no proxecto de execución, no tramo comprendido entre os apoios 46 e 47 da LAT 132 kV Chantada-Oural detectouse unha situación antirreglamentaria. A anomalía non pertence como tal á referida LAT, senón que se detectou na LMT 20 kV CHA813,



entre os apoios D94-12 e D94-24, tratándose dunha distancia non regulamentaria desta liña ao terreo en explotacións gandeiras ou agrícolas inferior a 7 m, polo que resulta necesario elevar a LAT Chantada-Oural no van entre os apoios 46 e 47, para que se poda elevar a LMT 20 kV CHA813 respecto ao terreo. Para a rectificación desta anomalía proxéctase a seguinte solución técnica:

- Substitución do apoio de formigón núm. 47 (ANG-ANC) existente, por un metálico e de maior altura 47N (ANG-ANC) en configuración triangular, localizándoo a 2,89 m entre eixes cara ao apoio 48 de maneira que o voo se modifique minimamente.

- Substitución do condutor existente entre os apoios 46 e 47N, cunha lonxitude de 128,38 m en condutor LA-180, e regulación do condutor existente entre os apoios 47N e 48.

2. O departamento territorial remitiulle, para a emisión dos correspondentes condicionados técnicos, as separatas do proxecto de execución da referida infraestrutura de distribución de enerxía eléctrica ás entidades afectadas: Concello do Saviñao e Dirección Xeral de Patrimonio Natural.

O Concello do Saviñao emitiu o seu condicionado técnico con data do 18.11.2025, do cal se deu traslado a UFD, quen presentou a súa conformidade ao mesmo con data do 27.11.2025.

A Dirección Xeral de Patrimonio Natural non contestou, polo que, sen prexuízo da autorización que lle corresponda outorgar, enténdese a súa conformidade co proxecto, de acordo co disposto no artigo 47.3 da Lei 9/2021, do 25 de febreiro, de simplificación administrativa e de apoio á reactivación económica de Galicia.

3. O 14.7.2026 o departamento territorial, logo de rematada a instrución do referido expediente, deu traslado do mesmo á Dirección Xeral de Planificación Enerxética e Minas (en adiante, DXPEM) para os efectos de ditar a oportuna resolución, incorporando ao expediente o informe emitido o 8.7.2026 polos seus servizos técnicos, en que se conclúe o seguinte: «Informa favorablemente o proxecto mencionado, para a autorización administrativa previa e de construción, sen prexuízo de terceiros e con independencia das autorizacións que sexan necesarias para a execución da obra por parte doutros órganos da Administración...».

Consideracións legais e técnicas:

1. Con base nos antecedentes mencionados, considérase que, no marco das autorizacións administrativas previa e de construción da referida infraestrutura de distribución de



enerxía eléctrica, seguíronse os trámites do procedemento establecidos na Lei 9/2021, do 25 de febreiro, de simplificación administrativa e de apoio á reactivación económica de Galicia, na Lei 24/2013, do 26 de decembro, do sector eléctrico, no Real decreto 1955/2000, do 1 de decembro, polo que se regulan as actividades de transporte, distribución, comercialización, subministración e procedementos de autorización de instalacións de enerxía eléctrica, e na Lei 39/2015, do 1 de outubro, do procedemento administrativo común das administracións públicas, e demais normas vixentes de aplicación.

2. A respecto da tramitación do referido expediente, cómpre salientar que está exenta do trámite de información pública, de conformidade coa excepción recollida no artigo 50.b) da Lei 9/2021, do 25 de febreiro, para as solicitudes de autorización administrativa de modificacións de instalacións de distribución de calquera tensión, sempre que non se solicite a declaración de utilidade pública nin sexa preceptiva a avaliación ambiental ordinaria.

3. En canto á avaliación de impacto ambiental dos proxectos, no artigo 7 da Lei 21/2013, do 9 de decembro, de avaliación ambiental, defínense os proxectos que terán que someterse a unha avaliación de impacto ambiental, ordinaria ou simplificada. A este respecto, no epígrafe 1.20.1 (aspectos ambientais) da memoria do proxecto de execución, establécese que segundo a lexislación vixente de avaliación ambiental (incluída a última modificación dos anexos I, II e III do Real decreto 445/2023), este non se atopa sometido a ningún trámite de avaliación de impacto ambiental.

4. A competencia para resolver este expediente correspóndelle á DXPEM, ao tratarse dunha liña eléctrica de 132 kV, de conformidade co disposto polo Decreto 9/2017, do 12 de xaneiro, da Consellería de Economía, Emprego e Industria, polo que se establecen os órganos competentes para a resolución dos procedementos de autorización de instalacións eléctricas que sexan competencia da Comunidade Autónoma de Galicia (DOG núm. 22, do 1 de febreiro), no seu artigo único, epígrafe 1.b.3º (autorizacións administrativas previa e de construción), así como no Decreto 42/2024, do 14 de abril, polo que se establece a estrutura orgánica da Xunta de Galicia (DOG núm. 73, do 14 de abril), no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia (DOG núm. 81, do 24 de abril), e no Decreto 140/2024, de 20 de maio, polo que se establece a estrutura orgánica da Consellería de Economía e Industria (DOG núm. 101, do 27 de maio).



De acordo con todo o anterior,

RESOLVO:

1. Outorgar a autorización administrativa previa para a infraestrutura de distribución de enerxía eléctrica denominada LAT 132 kV Chantada-Oural Regulamentación apoio núm. 47, no concello do Saviñao (Lugo), e que promove UFD Distribución Electricidad, S.A.

2. Outorgar a autorización administrativa de construción para o proxecto de execución da citada infraestrutura de distribución de enerxía eléctrica.

Todo isto de acordo coas condicións seguintes:

1. As instalacións que se autorizan terán que realizarse de acordo coas especificacións e planos que figuran no proxecto de execución denominado LAT 132 kV Chantada-Oural Regulamentación apoio núm. 47, asinado pola enxeñeira industrial María Isabel López Ferrer (colexiado núm. 17.566 do Colexio Oficial de Enxeñeiros Industriais de Madrid –COIIM–) e visado por este colexio, con nº 202503601 e data 12.9.2025.

2. O promotor (UFD) asegurará o mantemento e a vixilancia correcta das instalacións durante a construción e despois da súa posta en servizo, co fin de garantir que en todo momento se manteñan as condicións regulamentarias de seguridade. Sempre se deberán cumprir as normas e as directrices vixentes que resulten de aplicación, en particular, canto establece o Regulamento sobre condicións técnicas e garantías de seguridade en liñas eléctricas de alta tensión e as súas instrucións técnicas complementarias ITC-LAT 01 a 09, aprobados polo Real decreto 223/2008, do 15 de febreiro, e o Regulamento sobre condicións técnicas e garantías de seguridade nas instalacións eléctricas de alta tensión e as súas instrucións técnicas complementarias ITC-RAT 01 a 23, aprobados polo Real decreto 337/2014, do 9 de maio.

3. Para introducir modificacións nas instalacións que afecten datos básicos do proxecto será necesaria a autorización previa da DXPEM; non obstante, o departamento territorial poderá autorizar as modificacións de detalle do proxecto que resulten procedentes, debendo comunicar á dita dirección xeral todas as resolucións que se diten en aplicación da citada facultade.

4. O prazo para a posta en marcha das instalacións que se autorizan será de dezoito meses, contados a partir da data da última autorización administrativa necesaria para a súa



execución. Unha vez construídas estas instalacións, o promotor deberá presentar a solicitude de autorización de explotación ante o departamento territorial, quen deberá estendela tras as comprobacións técnicas que considere oportunas.

5. En canto aos bens e aos dereitos afectados pola referida infraestrutura de distribución de enerxía eléctrica e adscritos ás distintas administracións, organismos ou empresas de servizo público ou de servizos de interese xeral, o promotor cumprirá cos condicionados e informes emitidos por estes.

6. O incumprimento das condicións e requisitos establecidos nesta resolución ou a variación substancial dos presupostos que determinaron a súa adopción poderán dar lugar á súa revogación, previa audiencia ao promotor, de conformidade co disposto no artigo 53.10 da Lei 24/2013, do 26 de decembro.

7. Estas autorizacións adóptanse sen prexuízo de terceiros e independentemente das autorizacións, licenzas ou permisos de competencia municipal, provincial ou outros necesarios para a realización das obras da referida infraestrutura de distribución de enerxía eléctrica, en especial as relativas á ordenación do territorio e ao medio, tal e como dispón o título VII do Real decreto 1955/2000, do 1 de decembro.

8. Esta resolución publicarase no *Diario Oficial de Galicia*, de acordo co establecido no artigo 48.2 da Lei 9/2021, do 25 de febreiro.

Contra esta resolución, que non é definitiva en vía administrativa, poderase interpoñer recurso de alzada ante a conselleira de Economía e Industria da Xunta de Galicia, no prazo dun mes contado a partir do día seguinte ao da súa notificación ou publicación, de acordo co disposto nos artigos 121 e 122 da Lei 39/2015, do 1 de outubro, do procedemento administrativo común das administracións públicas, sen prexuízo de que os interesados poidan interpoñer calquera outro recurso que xulguen pertinente.

Santiago de Compostela, 22 de xullo de 2026

Pablo Fernández Vila
Director xeral de Planificación Enerxética e Minas

CVE-DOG: add6itn9-cjt5-isq0-tzv2-y0eqbftiyevo

